

Katikesema Ya Heidelberg

Northeren Sotho

SONTAGA SA 1 KGOTHAŠO YA RENA

Potšišo ya 1: Kgotthatšo e kgolo ya gago ka dinako tšohle ke eng?

Karabo: Se se nkgotthatšago ka dinako tšohle ke gore ke wa Jesu Kriste yo e lego Mophološi wa ka.

O lefetše melato ya ka ka madi a gagwe a bohlokwa, a mphološa maatleng a Sathane.

O ntlhokomela ka mehla. Le o tee wa meriri ya ka o ka se wele fase ka ntle le thato ya Tate wa magodimong.

Ka MoyaMokgethwa wa gagwe o ntshepiša gore ke na le bophelo bjo bo sa felego, gomme o dira gore ke be le maikemišetšo le boineelo bja go mo phelela.

Ditemana tša Beibele:

1 Bakorinthe 6:19-20; Baroma 14:7-9; 1 Petro 1:18-19; Mateo 10:29-31; Baroma 8:28

Potšišo ya 2: O swanetše go tseba eng gore o kgone go phela le go hwa o na le kgotthatšo ye?

Karabo: Sa mathomo, ke swanetše go tseba bogolo bja dibe tša ka. Sa bobedi ke swanetše go tseba gore ke phološwa bjang dibeng tša ka. Sa boraro ke swanetše go tseba gore nka leboga bjang Modimo ka lebaka la phološo yeo.

Ditemana tša Beibele:

Baroma 7:24-25

SONTAGA SA 2 BOGOLO BJA DIBE TŠA RENA

Potšišo ya 3: Dibe tša gago o di tseba bjang?

Karabo: Ka molao wa Modimo.

Ditemana tša Beibele:

Baroma 3:20

Potšišo ya 4: *Molao wa Modimo o re laela eng?*

Karabo: Ke seo Morena Jesu a re rutago sona kakaretšong ya molao: Morena Modimo wa gago o mo rate ka pelo ya gago ka moka, le ka moya wa gago ka moka, le ka tlhaologanyo ya gago ka moka. Ke yona taelo ya pele, yona e kgolo. Gomme ya bobedi e swana le yona, e re: wa geno o mo rate bjalo ka ge o ithata (Mateo 22:37-40).

Ditemana tša Beibele

Doiteronomio 6:5; Lefitiko 19:18

Potšišo ya 5: *O ka kgona go phetha molao wo ka botlalo naa?*

Karabo: Aowa, ka gobane go ya ka tlhago ke lenaba la Modimo le la batho.

Ditemana tša Beibele:

Baroma 8:7; 1 Johane 1:8-10

SONTAGA SA 3

SEBE SE TSWA KAE?

Potšišo ya 6: *Na e ka ba ke Modimo yo a bopilego motho e le yo mobe naa?*

Karabo: Aowa, Modimo o hlodile motho e le yo botse, a mmopa ka seswantšho sa gagwe; ke go re: e be e le motho yo a lokileng yo a phelago a le haufi le Mmopi wa gagwe.

Ditemana tša Beibele:

Genesi 1:26-31; Baefeso 4:24; Bakolose 3:9-10

Potšišo ya 7: *Ge go le bjalo, go tlile bjang gore motho a senyege a be yo mobe?*

Karabo: Batswadi ba rena, Adama le Efa, ba sentše taelo ya Modimo kua Paradeising. Go tloga mo tlhago ya rena ya ba ye e senyegilego ra ba badiradibe ka moka ga rena.

Ditemana tša Beibele: Genesi 3:1-13; Baroma 5:12, 18-19

Potšišo ya 8: *Na re senyegile gakaakaa gore re bile batho ba ba ratang bobee, batho ba ba šitwago ke go dira selo se se lokilego?*

Karabo: Ee, re senyegile ka mokgwa wo, ge e se ge re ka tswalwa lefsa ka Moya wa Modimo.

Ditemana tša Beibele:

Genesi 6:5-6; Johane 3:3-5

SONTAGA SA 4

KOTLO YA SEBE

Potšišo ya 9: Modimo ga a na phošo ge a neetše motho melao ye e mo palelago naa?

Karabo: Aowa, ka gobane mathomong Modimo o bopile motho ka bokgoni bja go phetha tšohle tšeo a di laetšwego. Eupya motho o ile a theetša Sathane, a tshela molao wa Modimo, a senya dineo tše Modimo a mo filego tšona.

Ditemana tša Beibele: Genesi 1:31, 3:13; Johane 8:44; Baroma 5:12

Potšišo ya 10: Na Modimo a ka tlogela bokgopo bja motho bo sa otlwe naa?

Karabo: Aowa! Modimo o galefile kudu ka lebaka la dibe tša rena. O boletše gore o tla di ahlola mehleng ya bjale le mehleng ye e sa felego.

Ditemana tša Beibele:

Genesi 4:6-11; Doiteronomio 27:26

Potšišo ya 11: Ge go le bjalo, na Modimo ga a na kwelobohloko?

Karabo: Modimo o na le kwelobohloko, gape, ke moahlodi wa makgonthe. Ka baka leo o nyaka gore sebe se otlwe ka kotlo yeo e se lekanego, e lego kotlo ye e sa felego

Ditemana tša Beibele: Ekisodo 34:6-7; Bahebere 10:28-31

SONTAGA SA 5/6a

MOPHOLOŠI YO A FEDIŠAGO KOTLO YA RENA

Potšišo ya 12: Re ka phološwa bjang kotlong ye le go humana kgaugelo gape na?

Karabo: Modimo o nyaka gore toko ya gagwe e phethagale. Ka lebaka leo re swanetše go phetha se se laelwago ke toko ya gagwe, goba re se phethelwe ke e

mongwe.

Ditemana tša Beibele: Baroma 8:3-4

Potšišo ya 13: *Re ka se kgone go itefella naa?*

Karabo: Aowa, re ka se kgone. Se re se dirago ke go atiša melato ya rena ka letsatsi le lengwe le le lengwe.

Ditemana tša Beibele: Baroma 2:4-5

Potšišo ya 14: *Ga go na sebopiwa se sengwe se se kago re lefella melato ya rena?*

Karabo: Aowa, Modimo ga a rate go otlala sebopiwa se sengwe ka lebaka la molato wa motho. Go feta mo, ga go na sebopiwa seo se ka rwalago bogale bja Modimo bakeng sa sebe.

Ditemana tša Beibele:

Hesekiele 18:20; Nahume 1:6

Potšišo ya 15-17: *Ge go le bjalo, re hloka mophološi o mobjang?*

Karabo: Go nyakega gore re humane mophološi yo e lego motho wa nnete le Modimo wa nnete.

Go nyakega gore mophološi wa nnete e be motho, ka gobane yo a dirilego sebe, ke motho. Ka lebaka leo sebe se swanetše go lefelwa ke motho.

Go nyakega gore mophološi wa nnete e be Modimo, gore ka maatla a bomodimo bja gagwe a tle a kgone go rwala boima bja bogale bja Modimo.

Ditemana tša Beibele: Bahebere 5:7-9; Bahebere 7:26-28

2 Bakorinte 5:21; Jesaya 53:5; Baroma 8:3-4

Potšišo ya 18: Mmoelanyi yoo e lego motho wa nnete le Modimo wa nnete, ke mang?

Karabo: Ke Morena wa rena Jesu Kriste.

Ditemana tša Beibele:

1 Bakorinthe 1:30

SONTAGA SA 6b

EBANGEDI

Potšišo ya 19: Taba yeo, o e tseba bjang?

Karabo: Ka ebangedi e kgethwa ya Modimo, yeo a thomilego go e utolla Paradeising. Ka morago a e kwatša ka baporofeta, a e swantšha ka dihlabele le ka melao ya kgwerano ya kgale. Mafelelong a e phethagatša ka Morwa wa gagwe Jesu Kriste.

Ditemana tša Beibele:

Genesi 3:15; Jesaya 42:1-4; Johane 5:39, 46; Bahebere 1:1-2

Potšišo ya 19a: Ga re sa šomiša melao ya kgwerano ya kgale naa?

Karabo: Ditiro tša kgale le diswantsho tša molao e be e le meriti ya Kriste gomme di be di šupa Yena. Re dumela gore di fedile mohla Kriste a tlilego mo lefaseng, gomme gare ga bakriste di swanetše go fedišwa. Molaetša wa tšona re o kwišiša ka seo se phethilwego ke Morena Jesu Kriste.

Ditemana tša Beibele:

Ditiro 10:9-15

Potšišo ya 19b: Dipuku ka moka tša Beibele ke Lentšu le le tshepegilego la Modimo naa?

Karabo: Ee, re dumela gore Lentšu la Modimo ga le a tšweletšwa ka go ithatela ga motho, eupya batho ba bakgethwa ba boletše ba išwa ke MoyaMokgethwa. Ka morago Modimo o laetše bahlanka ba gagwe gore ba ngwale Lentšu la gagwe mangwalong a makgethwa. Ka lebaka leo re dumela tšohle tše di ngwadilwego Beibeleng ka ntle le pelaelo. Tšohle tše motho a swanetšego go di dumela gore a be le mahlogonolo, di rutwa ka botlalo mo go yona.

Ditemana tša Beibele:

2 Timotheo 3:16-17; 2 Petro 1:21

SONTAGA SA 7

TUMELO YA BOKRISTE

Potšišo ya 20: Na batho ka moka ba tla phološwa ka Kriste, bjalo ka ge ba wetše sebeng ka Adama naa?

Karabo: Aowa. Ba ba phološwago ke bona fela ba ba dumelago go Kriste.

Ditemana tša Beibele: Johane 3:36, Baroma 1:16-17

Potšišo ya 21: Tumelo ya nnete ke eng?

Karabo: Tumelo ya nnete yeo e tlišwago ke MoyaMokgethwa mo pelong ya ka, ke tsebo yeo ke amogelago tšohle tše Modimo a di boletšego Lentšung la gagwe ka yona. Gape ke kholofelo ye e tiilego ya gore ke lebaletšwe dibe gomme ke filwe bophelo bjo bofsa bjo bo sa felego ka lebaka la Kriste.

Ditemana tša Beibele: Baroma 10:17, Bahebere 11:1

Potšišo ya 22: Seo mokriste a swanetšego go se dumela ke eng?

Karabo: Mokriste o swanetše go dumela tšohle tše di tshepišitšwego Ebangeding le tše di akareditšwego ditemaneng tša tumelo ya bokriste.

Ditemana tša Beibele:

Johane 20:30-31, Mateo 28:19

Potšišo ya 23: Ditemana tša tumelo ya bokriste di reng?

Karabo:

I.1. Ke dumela go Modimo Tate yo maatla ka moka, mohlodi wa legodimo le lefase.

II.2. Le go Jesu Kriste, Morwa wa gagwe motswalwanoši, Morena wa rena,

3. yo a amogetšwego ka Moyamokgethwa, a belegwa ke Maria kgarebe,

4. a hlokofatšwa mehleng ya Pontius Pilato, a bapolwa sefapanong, a hwa, a bolokwa, a fologela heleng,

5. a tsoga bahung ka letsatsi la boraro,

6. a rotogela legodimong, gomme o dutše letsogong le letona la Modimo Tate yo

maatla ka moka,

7. mo a tlogo boa gona go tlo ahlola ba ba phelago le ba ba hwilego.

III.8. Ke dumela le go Moyamokgethwa

9. le kereke e kgethwa ya bohle, le tshwaragano ya bakgethwa,

10. le tebalelo ya dibe,

11. le tsogo ya mmele,

12. le bophelo bjo bo sa felego.

SONTAGA SA 8

BORAROBOTEE

Potšišo ya 24: Ditemana tše di aroganywa bjang?

Karabo: Di aroganywa ka dikarolo tše tharo:

- I. Karolo ya pele e bolela ka ga Modimo Tate le tlholo ya rena.
- II. Karolo ya bobedi e bolela ka ga Modimo Morwa le phološo ya rena.
- III. Karolo ya boraro e bolela ka ga Modimo Moyamokgethwa le kgethafatšo ya rena.

Potšišo ya 25: Ka ge go na le Modimo o tee fela, ke ka lebaka la eng ge o bolela ba bararo: Tate, Morwa le Moyamokgethwa?

Karabo: Ke ka gobane Modimo o iponagaditše bjalo Lentšung la gagwe.

Ditemana tša Beibele: Doiteronomio 6:4; Mateo 28:19;

2 Bakorinthe 13:13

SONTAGA SA 9

MODIMO O HLODILE DILO TŠOHLE

Potšišo ya 26: *O dumela eng ge o re: Ke dumela go Modimo Tate, yo maatla ka moka, mohlodi wa legodimo le lefase?*

Karabo: Ke dumela gore Modimo Tate o hlodile legodimo le lefase le tšohle tše di lego gona. Ke yena yo a dutšego a di babalela le go di buša. Gomme ke yena Modimo wa ka le Tate wa ka ka baka la Jesu Kriste Morwa wa gagwe. Ke ka lebaka leo ke tshepago gore o tlo ntlhokomela ka tšohle tše ke di hlokago mmeleng le moyeng.

Ditemana tša Beibele: Genesi 1:1; Jeremia 32:17; Baroma 8:15-16; Bagalatia 3:26;

Dipsalme 37:5

SONTAGA SA 10 MODIMO O BBALELA TŠOHLE

Potšišo ya 27: *O dumela eng ka pabalelo ya Modimo?*

Karabo: Ke dumela gore Modimo o babalela legodimo le lefase le dibopiwa tšohle gomme o di buša ka seatla sa gagwe. Ke ka lebaka leo ke tshepago gore dimela le mabjang, pula le komelelo, dijo le dino, mahlatse le malwetši, lehumo le khumanego, le dilo ka moka, ga di itliše ka botšona eupša di tla go rena ka seatla sa Tate.

Ditemana tša Beibele: Mateo 10:29-30; Dipsalme 145:15-16

Potšišo ya 28: *Go thuša eng go tseba gore Modimo o bopile dilo tšohle gomme ke Yena yo a di hlokomelago ka pabalelo ya gagwe?*

Karabo: Ke gore re se fele pelo mo nakong ya dillo, re be le tebogo mo nakong ya lethabo, gomme re be le tshepo e tiilego gore ga go sebopiwa se se ka re kgaoganyago le lerato la Modimo.

Ditemana tša Beibele: Baroma 8:38-39

SONTAGA SA 11 LEINA LA JESU

Potšišo ya 29: *Ke ka lebaka la eng ge Morwa wa Modimo a bitšwa Jesu, ke go re Mophološi?*

Karabo: Ke ka lebaka la gore ke Yena yo a re phološago mo dibeng tša rena tšohle. Ga go na o mongwe yo re ka hwetšago phološo go yena.

Ditemana tša Beibele: Mateo 1:21

Potšišo ya 30: *Ba ba nyakang phološo ya bona go batho ba bangwe (e ka ba ba ba phelago, e ka ba ba ba hlokofetšego), ba na le tumelo ya nnete go Morena Jesu naa?*

Karabo: Aowa, ka gobane le ge ba mo paka ka melomo, ba mo itatola ka ditiro. Ba ba dumetšego go Jesu ba lebeletše Yena fela gore a ba fe tše ba di hlokago phološong ya bona.

Ditemana tša Beibele:

Ditiro 4:12; Johane 14:6

SONTAGA SA 12

LEINA LA KRISTE

Potšišo ya 31: *Ke ka lebaka la eng Morena Jesu a bitšwa Kriste (ke go re Motlotšwa)?*

Karabo: Ke ka lebaka la gore o tloiditšwe ka MoyaMokgethwa go ba Moporofeta le Moperisita le Kgoši.

Bjalo ka Moporofeta o re utolletše thato ya Modimo mabapi le phološo ya rena.

Bjalo ka Moperisita o itirile sehlabelo se se tlošago dibe tša rena, gomme ke yena Morapeledi wa rena pele ga Tate kua legodimong.

Bjalo ka Kgoši o re buša ka lentšu la gagwe le ka Moya wa gagwe, gomme o fenyala lenaba la rena, e lego Sathane.

Ditemana tša Beibele:

Mateo 3:16-17; Doiteronomio 18:15; Dipsalme 110:4; Luka 1:33

Potšišo ya 32: *Ke ka lebaka la eng ge wena o bitšwa mokriste?*

Karabo: Ke ka gobane ka tumelo ke setho sa Kriste gomme ke na le kabelo mo go tlotšweng ga gagwe. Ke go re le nna ke moporofeta le moperisita le kgoši.

Bjalo ka moporofeta ke bolela leina la gagwe.

Bjalo ka moperisita ke itira sehlabelo se se phelago.

Bjalo ka kgoši ke lwantšha dibe le Sathane.

Ditemana tša Beibele:

1 Johane 2:20; Mateo 10:32; Baroma 12:1

SONTAGA SA 13 MORWA WA MODIMO, MORENA WA RENA

Potšišo ya 33: Ke ka lebaka la eng ge a bitšwa Morwa wa Modimo Motswalwanoši?

Karabo: Ke ka lebaka la gore ke Yena fela yo e lego Morwa wa Modimo ka kgonthe. Ge e le rena, re amogetšwe go ba bana ba Modimo ka kgaugelo ka lebaka la Jesu.

Ditemana tša Beibele: Johane 1:14; Johane 3:16;

Baefeso 1:5-6

Potšišo ya 34: Ke ka lebaka la eng ge o mmitšha Morena wa rena?

Karabo: Ke ka lebaka la gore o re rekile ka madi a gagwe a bohlokwa, gore re be ba gagwe (e sego ba Sathane). Ka tsela ye Jesu Kriste o bile Mong wa rena le Molaodi wa rena.

Ditemana tša Beibele:

1 Bakorinthe 6:20; 1 Petro 1:18-19

SONTAGA SA 14 MATSWALO A MORENA JESU

Potšišo ya 35: O hlaologanya eng ka mantšu a a reng: “Yo a amogetšwego ka Moya o Mokgethwa, a belegwa ke Maria kgarebe”?

Karabo: Ke gore Morwa yo a sa felego wa Modimo o amogetše tlhago ya nnete ya bomotho ka ntle ga sebe.

Ditemana tša Beibele: Bagalatia 4:4; Luka 1:35; Bahebere 4:14,15

Potšišo ya 36: Naa matswalo a makgethwa a Morena Jesu a na le mohola ofe go wena?

Karabo: Ke na le mohola wa gore Morena Jesu ke Mmoelanyi wa rena gomme o khupetša sebe sa ka pele ga sefahlego sa Modimo.

Ditemana tša Beibele: Jesaya 53:10,11; Bahebere 7:26,27

SONTAGA SA 15 DITLHOKOFALO TŠA MORENA JESU

Potšišo ya 37: O kwišiša eng ka mantšu a a reng: “a hlokofatšwa”?

Karabo: Ke kwišiša gore Morena Jesu, mo matšatšing ohle a bophelo bja gagwe, gagologolo mafelelong a bjona, o rwele kotlo ya bogale bja Modimo ka lebaka la dibe tša rena.

Ditemana tša Beibele: Jesaya 53:3-5; Mateo 27:46; 2 Bakorinthe 5:21

Potšišo ya 38: Ke ka lebaka la eng ge a tlaišitšwe ka tlase ga Pontius Pilato?

Karabo: Ke go re: Yena yo a bego a se na molato, o ile a tsena kahlolong ya moahlodi wa sefefase, gore a tle a re lokolle kahlolong ya bogale bja Modimo.

Ditemana tša Beibele:

Johane 19:4; Ditiro 2:23; 1 Petro 3:18

Potšišo ya 39: Lefu la Morena Jesu la go bapolwa sefapanong le hlaloša eng?

Karabo: Ba ba bapotšwego sefapanong e be e le batho ba ba rogakilwego ke Modimo. Ka lebaka leo re lemoga gore Jesu o rwele thogako ye e bego e le mo go rena.

Ditemana tša Beibele: Bagalatia 3:13; Doiteronomio 21:23

SONTAGA SA 16 LEHU LA MORENA JESU

Potšišo ya 40: Ke ka lebaka la eng ge Kriste a ile a ikokobetša go fihlela lehung?

Karabo: Ke ka lebaka la gore go be go se na tsela engwe yeo re ka lefelwago sebe ka yona ge e se ka tsela ya lehu la Morwa wa Modimo.

Ditemana tša Beibele:

Genesi 2:17; Baroma 8:3; Bafilipe 2:8

Potšišo ya 41: Ke ka lebaka la eng ge a ile a bolokwa?

Karabo: E be e le go bea bohlatse bja gore ka nnete o hwile.

Ditemana tša Beibele: Mareka 15:43-46

Potšišo ya 42: Ge e le gore Kriste o re hwetše, ke ka baka la eng ge bjale le rena re swanetše go hwa?

Karabo: Lehu la modumedi ga se tefelo ya dibe, eupša ke mojako wa go tsena bophelong bjo bo sa felego.

Ditemana tša Beibele: Johane 5:24; Bafilipi 1:21-23

Potšišo ya 43: *Ke mohola ofe o re o bonang gape mo lehung la Kriste sefapanong?*

Karabo: Ke gore ka maatla a gagwe, motho wa rena wa kgale o a bapolwa, o a bolawa mme o bolokwa gammogo le Kriste.

Ditemana tša Beibele: Baroma 6:6,12-14.

Potšišo ya 44: *Ke ka lebaka la eng ge go latela mantšu a rego: "a fologela heleng"?*

Karabo: Ke go re mo dintweng tša rena tše boima, re swanetše go ba le bonnete le khomotšo ya gore Morena Jesu o re phološitše bohlokong le tlalelong ya dihele.

Ditemana tša Beibele: Mateo 27:45-46

SONTAGA SA 17 TSOGO YA MORENA JESU

Potšišo ya 45: *Tsogo ya Kriste e na le mohola ofe go rena?*

Karabo: Sa pele ke gore ka tsogo ya gagwe o fentše lehu. Seo se re bontsha gore kotlo ya sebe e fedišitšwe ke Morena Jesu.

Sa bobedi ke gore ka maatla a Morena Jesu le rena re tsošetšwa bophelong bjo bofsa.

Sa boraro tsogo ya Morena Jesu ke tshepišo gore le rena re tla tsoga gore re phele ka go sa felego.

Ditemana tša Beibele: Baroma 4:25; Baroma 6:4; 1 Bakorinthe 15:17-20, Johane 11:25-26

SONTAGA SA 18 THOTOGELo YA MORENA JESU

Potšišo ya 46: *O hlaologanya eng ka mantšu a reng "a rotogela legodimong"?*

Karabo: Ke hlaologanya gore Morena Jesu o rotogetše legodimong, barutiwa ba gagwe ba mmona ka mahlo. Ke tshepa gore Morena Jesu o sa tswela pele ka go re boloka mo tseleng ya phološo.

Ditemana tša Beibele:

Ditiro 1:9-11

Potšišo ya 47/48: *Na Kriste ga a gona mo go rena go fihlela bofelong bja lefase bjalo ka*

ge a re holofeditše?

Karabo: Kriste ke motho wa nnete le Modimo wa nnete. Ge e le bo-motho bja gagwe, ga a gona mo lefaseng, eupša ka bo-modimo bja gagwe o na le rena ka mehla.

Ditemana tša Beibele: Mateo 28:18-20

Potšišo ya 49: *Thotogelo ya Morena Jesu e na le mohola ofe mo go rena?*

Karabo: Sa pele, Morena Jesu o ile legodimong gore a be morapeledi wa rena go Tate.

Sa bobedi re na le nnete ya gore Morena Jesu bjalo ka hlogo ya rena o tlo re tšeela go yena.

Sa boraro o re rometše MoyaMokgethwa gore re phegelele tše di lego legodimong, e sego tše di lego mo lefaseng.

Ditemana tša Beibele:

1 Johane 2:1, Johane 12:32, Johane 14:2-3, Johane 16:7, Bakolose 3:1

SONTAGA SA 19 MORENA JESU O A BUŠA, O TLO BOA

Potšišo ya 50/51: *Morena Jesu o dutše letsogong le letona la Modimo. Ke go reng?*

Karabo: Letago le la Morena Jesu le re bontšha gore Modimo Tate o mo file maatla a go buša tšohle mo leineng la gagwe. Go feta mo Morena Jesu ke yena hlogo ya kereke. Ka lebaka leo ke tshepa gore Morena Jesu o tlo re šegofatša ka dimpho tše botse tša gagwe gomme o tlo re šireletša manabeng a rena.

Ditemana tša Beibele: Baefeso 1:20-23; Ditiro 2:33; Johane 10:28

Potšišo ya 52: *Morena Jesu o tlo boa go tlo ahlola ba ba phelang le ba ba hwileng. Taba ye e go kgothatša bjang?*

Karabo: E nkgothatša ka go re: Ka gare ga manyami le ditlhoriso ka moka ke emetše Morena Jesu bjalo ka Moahlodi yo a tšwago legodimong. Ge e le nna le badumedi ka moka, Morena Jesu e tlo ba Mophološi yo a re išago lethabong le le sa felego. Ge e le manaba a gagwe, o tlo ba iša tahlegong ye e sa felego.

Ditemana tša Beibele: Bafilipi 3:20-21; Kutollo 1:7; Mateo 25:34, 41

SONTAGA SA 20

MOYAMOKGETHWA

Potšišo ya 53: O dumela eng ka MoyaMokgethwa?

Karabo: Sa pele ke dumela gore MoyaMokgethwa ke Modimo wa nnete, gammogo le Tate le Morwa. Sa bobedi ke dumela gore ke neilwe MoyaMokgethwa gore ke be le kopano le Morena Jesu le dineo tšohle tše a ratilego go mpha tšona (phološo ya dibe, bophelo bjo bofsa, le tše dingwe).

Ditemana tša Beibele: Joele 2:28, Johane 14:16-17, Ditiro 2:1-4, Bagalatia 4:6

Potšišo ya 53a: O bona bjang thuto ye e rego bakriste ba swanetse go phegelela dineo tše di makatšago tša MoyaMokgethwa (mohlala: go bolela ka maleme a šele, go koba mademone)?

Karabo: MoyaMokgethwa o re file dineo gore badumedi ba kopanywe le Morena Jesu gomme phuthego e agišwe ka tšona. Ka lebaka leo re swanetše go phegelela dineo tše re kago agišana ka tšona.

Ditemana tša Beibele:

1 Bakorinthe 14:1-5, 12

SONTAGA SA 21a**KEREKE**

Potšišo ya 54: O dumela eng ka ga kereke e kgethwa ya ka gohle?

Karabo: Ke dumela gore mo ditshabeng tšohle Morena Jesu o iphuthela phuthego ya badumedi, a e šireletša, a e thekga, gore e fiwe bophelo bjo bo sa felego. Ke dumela gore ke setho se se phelago mo go yona.

Ditemana tša Beibele:

Mateo 16:15-18, Baefeso 4:11-16, 1 Bakorinthe 12:12, 27

Potšišo ya 54a: Ka ge dikereke di sa swane, kereke ya nnete re ka e tseba bjang?

Karabo: Kereke ya nnete ya Morena Jesu e na le maswao a mararo. Sa mathomo e ruta batho go ya ka Lentšu la Modimo. Sa bobedi e šomiša disakramente (e lego kolobetšo le selalelo) go ya ka taelo ya Morena Jesu. Sa boraro e kgalemela ba ba phelago mo sebeng.

Ditemana tša Beibele:

Bagalatia 1:8, 2 Bathesalonika 3:14-15

Potšišo ya 54b: Kereke ya Morena Jesu e swanetše go laolwa bjang?

Karabo: Morena Jesu ke Yena yo a bušago kereke ya gagwe ka Lentšu la gagwe le ka MoyaMokgethwa. Go feta mo Morena Jesu o agiša kereke ya gagwe ka go e fa baruti, bagolo le bahlanka.

Ditemana tša Beibele:

Tito 1:5-9, 1 Timotheo 3:8-10

SONTAGA SA 21b
TSHWARAGANO YA BAKGETHWA LE TEBALELO YA DIBE

Potšišo ya 55: O dumela eng ka tshwaragano ya bakgethwa?

Karabo: Sa mathomo ke dumela gore badumedi ka moka ba na le kabelo go Morena Jesu le go dineo tša gagwe. Sa bobedi ke dumela gore mang le mang o swanetše go šomiša dineo tša gagwe gore a agiše ba bangwe ka tšona.

Ditemana tša Beibele:

Ditiro 2:43-47, 1 Bakorinthe 12:4-11, 26-27

Potšišo ya 56: O dumela eng ka tebalelo ya dibe?

Karabo: Ke dumela gore Modimo a ka se hlwe a gopola dibe tša rena ka lebaka la Morena Jesu Kriste.

Ditemana tša Beibele: Dipsalme 32:1-6, Dipsalme 103:12, 1 Johane 2:1-2

SONTAGA SA 22
TSOGO YA MMELE LE BOPHELO BJO BO SA FELEGO

Potšišo ya 57: O dumela eng ka tsogo ya mmele?

Karabo: Ke dumela gore, morago ga bophelo bjo, moya wa ka o tlo rotogela go Morena Jesu. Go feta mo ke dumela gore Morena Jesu o tlo tsoša mmele wa ka ka letsatsi la go boa ga gagwe mme o tlo kopanya moya wa ka le mmele wa ka.

Ditemana tša Beibele:

Bafilipi 3:21, 1 Bathessalonika 4:16, 1 Bakorinthe 15:53

Potšišo ya 58: O dumela eng ka bophelo bjo bo sa felego?

Karabo: Ke dumela gore, morago ga bophelo bjo, Morena Jesu o tlo mpha lethabo le legolo le kgaugelo ye e sa felego, mme ke tlo reta Modimo ka mehla yohle.

Ditemana tša Beibele:

1 Bakorinthe 2:9, 2 Bakorinthe 5:1-3

SONTAGA SA 23

RE LOKAFATŠWA KA TUMELO

Potšišo ya 59: Go thuša eng go dumela ditemana tšeo tša tumelo ya bokriste?

Karabo: Sa mathomo, ke lokafetše pele ga Modimo. Sa bobedi, ke bile mojalefa wa bophelo bjo bo sa felego.

Ditemana tša Beibele: Habakuk 2:4, Baroma 1:17, 3:28

Potšišo ya 60/61: O lokafetše bjang pele ga Modimo?

Karabo: Ke lokafetše fela ka tumelo ya nnhete go Jesu Kriste. Le ge letswalo la ka le mpotša gore ke tshetše melao ya Modimo ka moka, ke dumela gore Modimo ka kgaugelo ya gagwe o mpha seloba se se phethegilego le tokafatšo le kgalalelo ya Morena Jesu Kriste. O mpalela tšona bjalo ka ge nke ga se nke ka dira sebe.

Ditemana tša Beibele: Genesi 15:6, Baroma 4:5, 5:1

SONTAGA SA 24 MEDIRO YE E LOKILEGO

Potšišo ya 62: Mediro ya rena ye e lokilego e ka se kgone go re lokafatša pele ga Modimo naa?

Karabo: Mediro ye e lokilego e a nyakega, ka gobane tumelo ye e se nago mediro, ke tumelo ye e hwilego. Le ge go le bjalo, mediro ye e lokilego ya rena e ka se kgone go re lokafatša pele ga Modimo, ka gobane ešita le mediro ya rena ye e lokilego e tšhilafaditšwe ke dibe.

Ditemana tša Beibele: Jakobo 2:26, Baroma 3:20;

Baefeso 2:8-10

Potšišo ya 63: Modimo ga a re fe moputso ka lebaka la mediro ya rena ye e lokilego naa?

Karabo: Modimo o re fa moputso, fela, ga se gore o swanetše. O re fa moputso ka kgaugelo fela.

Ditemana tša Beibele: Luka 17:10, Baroma 4:1-5

Potšišo ya 64: Ge mediro ye e lokilego e ka se kgone go re lokafatša pele ga Modimo, batho ba ka se re mediro ye e lokilego ga e na bohlokwa naa?

Karabo: Aowa, mokriste wa nnete a ka se kgone go hloka dienywa tša tumelo.

Ditemana tša Beibele: Mateo 7:18, Johane 15:5

SONTAGA SA 25 DISAKRAMENTE

Potšišo ya 65: Ka ge e le tumelo fela yeo e dirago gore re be le kabelo mo go Jesu Kriste le dineo tša gagwe, tumelo yeo e tšwa kae?

Karabo: Tumelo yeo e tšwa go MoyaMokgethwa. O bjala tumelo mo dipelong tša rena ka thero ya Evangedi, mme o e tliša ka tirišo ya disakramente.

Ditemana tša Beibele: Baroma 10:14-17; 1 Bakorinthe 12:3; Baefeso 2:8

Potšišo ya 66: Disakramente ke eng?

Karabo: Disakramente ke dipontšho le maswao a makgethwa a a bonwago ka mahlo. Modimo o re file disakramente gore, ka go di diriša, re kgone go kwišiša tshepišo ya gagwe ka botlalo. Tshepišo yeo ke gore Modimo o re fa tebalelo ya dibe le bophelo bjo bo sa felego ka lebaka la sehlabelo sa Kriste sefapanong.

Potšišo ya 67: Disakramente ga di na maatla a go re phološa naa?

Karabo: Disakramente ga di na maatla ka botšona, eupša di re gopotša sehlabelo sa Kriste sefapanong seo e lego motheo wa phološo ya rena fela.

Ditemana tša Beibele: Baroma 6:3

Potšišo ya 68: Morena Jesu o hlomile disakramente tše kae mo kgweranong e mpsa?

Karabo: Tše pedi, e lego kolobetšo e kgethwa le selalelo se sekgethwa.

Ditemana tša Beibele: Mateo 28:19, Mateo 26:26-28

SONTAGA SA 26 KOLOBETŠO E KGETHWA

Potšišo ya 69: Kolobetšo e bontsha le go tliša bjang gore sehlabelo sa Morena Jesu Kriste sefapanong se tliša mohola go rena?

Karabo: Morena Jesu o re tshepiša gore, go swana le ge re hlatswiwa ditshila tša mmele ka meetse, re hlatswiwa ditshila tša moya ka madi a gagwe le ka MoyaMokgethwa.

Ditemana tša Beibele: Mateo 28:18-20,

Mareka 16:16

Potšišo ya 70: Go hlatswiwa ka madi a Kriste le ka MoyaMokgethwa go ra go reng?

Karabo: Go hlatswiwa ka madi a Kriste ke go amogela tshwarelo ya dibe ka lebaka la madi a Morena Jesu. Go hlatswiwa ka MoyaMokgethwa ke go mpshafatšwa ka mošomo wa MoyaMokgethwa gore re tle re phele bophelo bjo bofsa.

Ditemana tša Beibele: Baefeso 1:7; 1 Johane 1:7;

Mateo 3:11; Tito 3:5

Potšišo ya 71-73: Tlhatso ya ka ntle ka meetse ke yona ye e tlošago dibe mo go rena naa?

Karabo: Aowa. Meetse ga a na maatla a go tloša dibe mo go rena. Meetse ke pontšho le leswao fela. Nnete ke gore, go swana le ge ditšhila tša mmele di tlošwa ke meetse, dibe tša rena di tlošwa ke madi a Jesu Kriste le mošomo wa MoyaMokgethwa.

Ditemana tša Beibele: Ditiro 2:38, Baroma 6:3-4

SONTAGA SA 27 KOLOBETŠO YA BANA

Potšišo ya 74: Bana le bona ba swanetše go kolobetšwa naa?

Karabo: Ee, ka gobane le bona ba amogetšwe kgweranong ya Modimo le kerekeng ya gagwe bjalo ka batho ba bagolo. Ka lebaka leo ba swanetše go tsenywa mo kerekeng ya bokriste le go aroganywa le bana ba bao ba sa dumelego, bjalo ka ge go be go dirwa kgweranong ya kgale ka mokgwa wa lebollo.

Ditemana tša Beibele: Genesi 17:9-14,

Mateo 19:14, Ditiro 2:38-39, 1 Bakorinthe 7:14

SONTAGA SA 28/29 SELALELO SE SEKGETHWA

Potšišo ya 75: Selalelo se sekgethwa se bontšha le go tiiša bjang gore re na le kopano go sehlabele sa Morena Jesu sefapanong?

Karabo: Morena Jesu Kriste o re laetše gore re mo gopole ka go ja senkgwa le go nwela senwelong sa beine. A ba a tshepiša gore mmele wa gagwe o ntlhabetswe mo sefapanong le madi a gagwe a ntshogetswe bjalo ka ge ke bona ka mahlo gore ke fiwa senkgwa le senwelo. Go swana le ge mohlanka a mpha senkgwa le beine, Morena Jesu o tla fepa moya wa ka ka mmele wa gagwe le madi a gagwe

go iša bophelong bjo bo sa feleng.

Ditemana tša Beibele: Mat. 26:26-28

Potšišo ya 76,77: 'Go ja mmele wa Kriste wo o robilwego le go nwa madi a gagwe a a tšholotšwego', ke go reng?

Karabo: Sa mathomo ke go dumela gore ditlaišego tšohle tša Kriste le lehu la gagwe di mpha tshwarelo ya dibe le bophelo bjo bo sa felego. Sa bobedi Moya o mokgethwa yo a agilego mo go Kriste le mo go rena, o re kopanya le Morena Jesu Kriste.

Ditemana tša Beibele: Johane 1:29; Johane 6:55,56

Potšišo ya 78-80: A senkgwa se fetoga mmele wa Kriste le beine madi a gagwe ka sebele naa?

Karabo: Aowa, go swana le ge meetse a kolobetso a sa fetoge madi a Kriste, senkgwa sa selalelo ga se fetoge mmele wa gagwe.

Ditemana tša Beibele: 1 Bakorinthe 10:16

SONTAGA SA 30 BA BA JANG SELALELO

Potšišo ya 81: Selalelo sa Morena se jewa ke bomang?

Karabo: Ke bao ba inyatšago ka baka la dibe tša bona, gape ba ba holofelago gore ba di lebaletšwe ka baka la Kriste, gape ba ba nago le maikemišetšo a gore tumelo ya bona e tiišwe gomme bophelo bja bona bo kaonafatšwe.

Ditemana tša Beibele: 1 Bakorinthe 11:28-30

Potšišo ya 82: Bao ba phelago bjalo ka ba ba sa dumelego, ba na le tokelo ya go ja selalelo se sekgethwa naa?

Karabo: Aowa, ka gobane kgwerano ya Modimo e ka nyefolwa, mme kgalefo ya gagwe e ka tukela phuthago yohle. Ge e le batho ba ba bjalo, kereke e swanetše go ba tswalelela ka ntle ka go šomiša dinotlelo tša mmušo wa legodimo, go fihlela ge ba ka sokologa.

Ditemana tša Beibele: 1 Bakorinthe 5:11; Tito 3:10

SONTAGA SA 31 DINOTLELO TŠA MMUŠO WA LEGODIMO

Potšišo ya 83: Dinotlelo tša mmušo wa legodimo ke eng?

Karabo: Ke tše pedi, e lego kgašo ya ebangedi le kgaolo ya sekriste. Ka ditiro tše pedi tše mmušo wa legodimo o bulelwa badumedi gomme o tswalelelwa ba ba

sa dumeleng.

Ditemana tša Beibele: Mateo 16:18-19

Potšišo ya 84: Mmušo wa legodimo o bulwa le go tswalelwa bjang ka kgašo ya ebangedi?

Karabo: Ge e le badumedi, ba tsebagatšwa gore Modimo o ba lebaletše dibe tša bona ka baka la mošomo wa Kriste. Ge e le ba ba sa dumeleng, ba tsebagatšwa gore bogale bja Modimo bo okametše ba ba ganang go sokologa.

Ditemana tša Beibele: Johane 3:35-36,

Johane 20:21-23

Potšišo ya 85: Mmušo wa legodimo o bulwa le go tswalelwa bjang ka kgaolo ya sekriste?

Karabo: Ba ba tswileng mo tseleng ya Modimo ba kgalemelwa gantši ka moya wa sekriste.

Ge ba ka gana go sokologa, ba swanetše go begwa phuthegong (ke go re: bagolo ba phuthego).

Ge ba ka gana go amogela dikgalemelo tša bagolo, ba swanetše go thibelwa go šomiša disakramente. Ka morago ga fao ba tlo kgaolwa phuthegong gomme ba tswalelwa ntle ke Modimo mmušong wa legodimo.

Eupša, ge ba ka tshepiša le go bontšha tshokologo ya nnete, ba boela ba amogelwa go ba ditho tša Kriste le phuthego ya gagwe.

Ditemana tsa Beibele: Mateo 18:15-20;

1 Bakorinthe 5:3-5,11-13; 2 Johane :10-11

SONTAGA SA 32 MEDIRO YE E DIRWAGO GO TSWA TUMELONG

Potšišo ya 86: Ge re phološitšwe dibeng ka lebaka la kgaugelo ya Morena fela (e sego ka lebaka la mediro ya rena), ke ka lebaka la eng ge re swanetše go dira mediro ye e lokileng?

Karabo: Morena Jesu, ka morago ga ge a re lokolotše ka madi a gagwe, o tswela pele ka go re mpshafatša, gore re swane le Yena.

Maikemišetšo a gagwe ke gore (1) ka bophelo bja rena re bontšhe tebogo ya rena go Modimo, (2) ka dienywa tša tumelo re be le nnete ya gore re na le tumelo ya

nnete, (3) ka bophelo bja rena re gogele batho ba bangwe go Kriste.

Ditemana tša Beibele:

Luka 6:43-45, Mateo 5:14-16

Potšišo ya 87: Ba ba ganago go sokologa ba ka phološwa naa?

Karabo: Aowa! Lentšu la Modimo le re: Badirabobe, ba ba rapelago medimo e šele, diotswa, mahodu, ba megabaru, matagwa, barogani, bahlakodi, le ba bangwe ba ba swanago le bona, ga ba na kabelo mmušong wa Modimo.

Ditemana tša Beibele: 1 Bakorinthe 6:9-10,

Baefeso 5:3-6

SONTAGA SA 33 TSHOKOLOGO

Potšišo ya 88: Tshokologo ya nnete ya motho ke eng?

Karabo: Ke go hwa ga motho wa kgale le go tsoga ga motho e mofsa.

Ditemana tša Beibele: Ditiro 3:17-19,

Baefeso 4:22-24, Bakolose 3:5-10

Potšišo ya 89: Go hwa ga motho wa kgale ke eng?

Karabo: Ke go itshola ka pelo yohle ka ge re galefišitše Modimo ka dibe tša rena. Gape ke go di hloya le go di tlogela.

Ditemana tša Beibele: Baroma 8:12-13

Potšišo ya 90: Go tsoga ga motho e mofsa ke eng?

Karabo: Ke go thabela Modimo ka pelo yohle ka baka la Kriste. Gape ke ge mokriste a ineetše go phela go ya ka thato ya Modimo medirong ka moka ye e lokilego.

Ditemana tša Beibele: Bagalatia 2:20

Potšišo ya 91: Mediro ye e lokilego ke eng?

Karabo: Ke mediro yeo e dirwago go tswa tumelong ya nnete fela, gape ke mediro yeo e dirwago go ya ka molao wa Modimo fela (e sego go ya ka

megopolo ya batho).

Ditemana tša Beibele: Bahebere 11:6,

Hesekiele 20:18-19

SONTAGA SA 34a

MOLAO WA MODIMO

Potšišo ya 92: Molao wa Modimo o reng?

Karabo: Ekisodo 20:1-17:

Mantšu a a boletšwego ke Morena ka moka šea, o itše:

Ke Nna Morena Modimo wa gago. Ke Nna ke go ntšhitšego nageng ya Egipita ngwakong wa bohlanga.

- 1) Ke se ke ka bona o na le medimo e šele.
- 2) O se ke wa itirela modimo wa go betlwa, le ge e le seswantšho se sengwe sa tše di lego kua legodimong, le ge e le sa tše di lego mono lefaseng, le ge e le sa tše di lego meetseng ka tlase ga lefase. O se ke wa di khunamela; o se ke wa di direla; ka gobane nna Morena Modimo wa gago ke Modimo yo bogale, e a latago bokgopo bja botata-go-bana go bana ba bona go fihla molokong wa boraro le wa bone mo go ba ba ntlhoilego. Gomme ge e le ba ba nthatago, ba ba hlokomelago melao ya ka, ke ba dira ka botho go iša melokong e sekete.
- 3) O se ke wa bolela leina la Morena Modimo wa gago ka lefela; ka gobane e a bolelago leina la gagwe ka lefela, Morena a ka se ke a mo lesa a sa otlwe.
- 4) Gopola letšatši la go khutša, o le kgethe. O sware mediro ka matšatši a selelago, o phethe mešomo ya gago ka moka. Ge e le letšatši la go šupa ke la go khutša, ke la Morena Modimo wa gago, ka lona o se ke wa swara modiro le o tee, le ge e le wena, le morwa wa gago, le morwedi wa gago, le molata wa gago wa monna le wa mosadi, le seruiwa sa gago, le modiiledi e a lego dikgorong tša geno. Ka gobane Morena, legodimo le lefase le lewatle, le tšohle tše di lego gona, o di dirile ka matšatši a selelago, mme a khutša ka letšatši la go šupa. Ke ka baka leo Morena a le šegofaditšego a le dira le lekgethwa.
- 5) Hlompha tatago le mmago, gore o phele galelele nageng ye Morena Modimo wa gago a go fago yona.
- 6) O se ke wa bolaya.
- 7) O se ke wa otswa.
- 8) O se ke wa utswa.
- 9) O se ke wa bolela bohlatse bja maaka go wa geno.
- 10) O se ke wa duma ntlo ya wa geno. O se ke wa duma mosadi wa wa geno, le molata wa gagwe wa monna le wa mosadi, le kgomo ya gagwe, le pokolo ya gagwe, le tšohle tše e lego tša wa geno.

Potšišo ya 93: Melao ye e kgaogantšwe bjang?

Karabo: E kgaogantšwe ka dikarolo tše pedi. Karolo ya mathomo e re ruta gore re itshware bjang mabapi le Modimo. Karolo ya bobedi e re ruta gore re itshware bjang mabapi le batho ba bangwe.

Ditemana tša Beibele: Mateo 22:37-40

SONTAGA SA 34b

MOLAO WA PELE

Potšišo ya 94: Molao wa pele o re: Ke se ke ka bona o na le medimo e šele. Modimo o re laela eng ka molao wo?

Karabo: Modimo o re laela gore re tlogele go direla medimo e šele, re tlogele go direla badimo, re tlogele boloi le tumelonyana (superstition). Re ithute go tseba Modimo wa nnete gabotse, re tshepe yena fela, re ipee ka tlase ga gagwe fela, re lebelele tšohle tše botse gore di tlo tšwa go yena fela, gomme re mo rate ka pelo yohle.

Ditemana tša Beibele: Doiteronomio 18:10-11, Joshua 24:14, Mateo 4:8-10, 1 Johane 5:21

Potšišo ya 95: Medimo e šele (medingwana) ke eng?

Karabo: Ke se sengwe le se sengwe se motho a se tshepago legatong la Modimo wa nnete, e ka ba badimo, e ka ba batho ba ba phelago, e ka ba ditaola, e ka ba tshelete, bj.bj.

Ditemana tša Beibele: Lefitiko 19:31,

Jesaya 8:19-20, Mateo 6:24

SONTAGA SA 35

MOLAO WA BOBEDI

Potšišo ya 96: Molao wa bobedi o re: O se ke wa itirela modimo wa go betlwa. Modimo o re laela eng ka molao wo?

Karabo: Modimo o re laela gore re se ke ra dira seswantšho ka Yena, le gona re se ke ra leka go mo direla ka mokgwa o mongwe wo o fapanago le wo a re laetšego Lentšung la gagwe.

Ditemana tša Beibele: Doiteronomio 4:23-26;

Ekisodo 32:1-14, Johane 4:24

Potšišo ya 97: Ga ra dumelelwa go dira diswantšho naa?

Karabo: Ga ra dumelelwa go dira diswantšho tša Modimo. Ge e le dibopiwa, re ka dira diswantšho tša tšona, eupša re se di šomiše go direla Modimo ka tšona.

Ditemana tša Beibele: Jesaya 40:25

Potšišo ya 98: Ge e le meetse a makgethwa le dithapo le dikota le dithušo tše dingwe tše di šomišwago mo dikerekeng tše dingwe, di ka se kgone go re šireletša le go re tiiša naa?

Karabo: Aowa, Modimo o na le maatla a go re thuša ka ntle le dithušo tše bjalo. Go feta mo, Modimo o nyaka gore re bee tshepo le tumelo ya rena mo go Yena fela, e sego mo dilong tše di dirilwego ke diatla tša batho.

SONTAGA SA 36/37

MOLAO WA BORARO

Potšišo ya 99-100: Molao wa boraro o re: O se ke wa bolela leina la Morena Modimo wa gago ka lefela. Modimo o re laela eng ka molao wo?

Karabo: Modimo o re laela gore re se ke ra šomiša leina la gagwe ka mokgwa o sa lokang, e ka ba ka go goboša leina la Morena, goba go porofeta maaka ka lona, goba go raloka ka lona, goba go ikana mo go sa swanelago. Modimo o nyaka gore re šomiše leina la gagwe ka poifo le ka tlhompho.

Ditemana tša Beibele: Lefitiko 19:12;

Lefitiko 24:15-16, Ezekiele 13:6-9, Mateo 5:33-37

Potšišo ya 101-102: Go ka ba le mokgwa wo o lokilego wa go ikana ka leina la Modimo na?

Karabo: Ee, ge mmušo o ka kgopela keno mo go rena. Go ikana ka keno ye bjalo go theilwe mo Lentšung la Modimo.

Ditemana tša Beibele: Ekisodo 22:9,

Doiteronomio 10:20, Esra 10:5

SONTAGA SA 38

MOLAO WA BONE

Potšišo ya 103: Molao wa bone o re: Gopola letsatsi la go khutša, o le kgethe. Modimo o re laela eng ka molao wo?

Karabo: Modimo o re laela gore ka letsatsi la Morena, e leng letsatsi la khutšo, re be le lethabo le mafolofolo a go kopana le phuthego ya Morena, mme re swanetše go hlokomela gore ditshebeletso le diklase tša kereke di tswela pele gabotse. Go feta mo re tlogele mediro ye e sa lokago, gore ka tsela ye re thome go tsena khutšong ya sabatha ye e sa felego.

Ditemana tša Beibele: Ekisodo 31:12-17,

Ditiro 2:46-47, Bahebere 10:24-25,

Potšišo ya 103a: Re swanetše go dira eng tshebeletsong ya ka Sontaga?

Karabo: Re swanetše go kwa Lentšu la Modimo, go šomiša disakramente, go rapela Modimo le go mo opelela, le go tlišetša bahumanegi dimpho tša lerato.

Ditemana tša Beibele: 1 Timotheo 4:13 (Lentšu la

Modimo); Ditiro 20:7 (disakramente);

Bakolose 3:16 (dithapelo le difela);

1 Bakorinthe 16:2 (dimpho tša lerato)

SONTAGA SA 39

MOLAO WA BOHLANO

Potšišo ya 104: Molao wa bohlanano o re: Hlompha tatago le mmago. Modimo o re laela eng ka molao wo?

Karabo: Modimo o laela gore re bontšhe tlhompho, lerato le botshepegi go batswadi le go bohle ba ba beilwego ka godimo ga rena.

Ditemana tša Beibele: Baroma 13:1-7,

Baefeso 6:1-9

Potšišo ya 104a: Ke ka lebaka la eng ge go na le pušo (di-government) mo lefaseng?

Karabo: Modimo o beile dikgoši le dipresidente gore bokgopo bja batho bo otlwe mme tšohle di sepele ka molao mo gare ga batho. Ka lebaka leo re swanetše go ipea ka tlase ga mmušo, go ntšha makgetho, go hlompha babuši le go ba rapelela gore re phele khutšong.

Ditemana tša Beibele:

1 Timotheo 2:1-4

SONTAGA SA 40 MOLAO WA BOSELELA

Potšišo ya 105: Molao wa boselela o re: O se ke wa bolaya. Modimo o re laela eng ka molao wo?

Karabo: Modimo o re laela gore re se ke ra bolaya batho ba bangwe, gape, re se ke ra ba kwiša bohloko, ge e le ka ditiro, le ge e le ka mantšu a rena. Gape o re laela gore re lahle tefetšo, gomme re se ke ra ikiša kotsing ka boomo. Ke ka lebaka leo mmušo o swere lerumo la go thibela polao.

Ditemana tša Beibele: Genesi 9:6, Mateo 5:21-22,

Baroma 13:4

Potšišo ya 106-107: Naa go lekane ge re sa bolaye motho?

Karabo: Aowa, ga go a lekana. Ge Modimo a ganetša lehufa le lehloyo le kgalefo, o re laela gore re rate batho ba bangwe bjalo ka ge re ithata, gomme manaba a rena re a dire gabotse.

Ditemana tša Beibele: Baefeso 4:26-32,

Mateo 5:43-48

SONTAGA SA 41 MOLAO WA BOSUPA

Potšišo ya 108: Molao wa bosupa o re: O se ke wa otswa. Modimo o re laela eng ka molao wo?

Karabo: O re laela gore re hlomphe lenyalo, gomme re se ke ra dira bootswa. Mang le mang a rate molekane wa gagwe. Ge e le ba bafsa ba itokišetše lenyalo ka mokgwa wo o kgahlišago Morena.

Ditemana tša Beibele: 1 Bathesalonika 4:3-8,

Baefeso 5:28-33, Bahebere 13:4

Potšišo ya 109: Modimo o ganetša fela bootswa le tše dingwe tše hlabišago dihlong naa?

Karabo: Mmele wa rena le moya wa rena ke ditempele tša MoyaMokgethwa. Ka lebaka leo Modimo o rata gore re di hlokomele, e be tše di hlwekilego le tše kgethwa. Modimo o ganetša mokgwa o mongwe le o mongwe wa go dira bootswa, e ka ba ditiro goba ka mantšu goba ka megopolo goba ka dikganyogo.

Ditemana tša Beibele: 1 Bakorinthe 6:18-20,

Mateo 5:27-29,

**SONTAGA SA 42
MOLAO WA SESWAI**

Potšišo ya 110: Molao wa seswai o re: O se ke wa utswa. Modimo o re laela eng ka molao wo?

Karabo: Modimo o ganetša bohodu le bohlokodi le bofora le maano ka moka ao re a dirago gore re tšeele motho o mongwe tše e lego tša gagwe. Go feta fao Modimo o ganetša megabaru. Ge e le dimpho tše a re filego tšona, o nyaka gore re di hlokomele, re se ke ra di senya.

Ditemana tša Beibele: Ekisodo 22:1-4,

1 Bakorinthe 6:9-10, Doit. 25:13-16,

1 Tim. 6:9-10

Potšišo ya 111: Modimo o laela eng ka molao wo?

Karabo: O re laela gore re thuše batho ba bangwe gore ba be le bophelo, re ba tswetše pele ka mo re kgonago ka gona.

Ditemana tša Beibele: Ekisodo 23:4-5,

Mateo 7:12, Bagalatia 6:9-10

**SONTAGA SA 43
MOLAO WA SENYANE**

Potšišo ya 112: Molao wa senyane o re: O se ke wa bolela bohlatse bja maaka go wa geno. Modimo o re laela eng ka molao wo?

Karabo: O re laela gore re se ke ra bolela maaka, re se ke ra fetola mantšu a motho, gomme re se ke ra seba, ka gobane tše di swanago le tšeo ke mediro ya diabolo. Modimo o nyaka gore re rate therešo, re šireletše maina a batho, gomme re ba emele ka mo re kgonago ka gona.

Ditemana tša Beibele: Ekisodo 23:1, Diema 12:22,

Baefeso 4:25, Jakobo 4:11

**SONTAGA SA 44
MOLAO WA LESOME**

Potšišo ya 113: Molao wa lesome o re: O se ke wa duma. Modimo o re laela eng ka molao wo?

Karabo: O re laela gore mo dipelong tša rena go se ke gwa ba le kganyogo goba

mogopolo o mongwe wo o ganetšago molao wa Modimo, eupša re be manaba a sebe ka pelo yohle.

Ditemana tša Beibele: Baroma 7:7-8

Potšišo ya 114: Bao ba sokologetšego go Modimo ba ka phetha melao ye ka botlalo na?

Karabo: Aowa, gobane le ba bakgethwa-kgethwa ba no ba le mathomonyana fela a theeletšo ye. Le ge go le bjalo, ka maikemišetšo a tiilego ba thoma go phela go ya ka melao ya Modimo.

Ditemana tša Beibele: Baroma 7:14-15,

Baroma 7:22-25, 1 Johane 1:8, Bafilipi 3:12-16

Potšišo ya 115: Ge e le gore ga go na motho yo a kgonago go phetha melao ya Morena ka botlalo, ke ka lebaka la eng ge Modimo a nyaka gore melao ye lesome e rutwe ka maatla a makaalo go rena na?

Karabo: Sa pele ke gore mo bophelong bja rena ka mehla re lemoge tlhago ya rena ya sebe, gomme re batle tebalelo ya dibe go Jesu Kriste. Sa bobedi ke gore re be le mafolofolo a go rapela Modimo gore a re nee MoyaMokgethwa, gore bophelo bja rena bo mpshafale.

Ditemana tša Beibele: 1 Johane 1:9,

1 Johane 3:1-3

SONTAGA SA 45 THAPELO

Potšišo ya 116: Ke ka lebaka la eng ge bakriste ba swanetše go rapela?

Karabo: Ke ka lebaka la gore thapelo ke karolo e kgolo ya tebogo yeo Modimo a e nyakago go rena. Go feta mo Modimo o rata go nea dimpho tša gagwe (e lego kgaugelo ya gagwe le MoyaMokgethwa) go bao fela ba ba di kgopelago go Yena ka mehla.

Ditemana tša Beibele: Dipsalme 32:6;

1 Bathess. 5:16-18; Luka 11:9-13

Potšišo ya 117: Thapelo ye e kgahlago Modimo ke thapelo e bjang?

Karabo: Sa mathomo, re rapele ka pelo yohle gomme re rapele Modimo wa nnete

a nnoši fela.

Sa bobedi, re ikokobetše pele ga gagwe, re bone tlalelo ya rena le molato wa rena.

Sa baroro, re tshepe gore o tla kwa dithapelo tša rena ka lebaka la Kriste.

Ditemana tša Beibele: 1 Johane 5:14-15;

2 Koronika 7:14; Johane 14:13-14

Potšišo ya 118: Modimo o re laetše gore re kgopele eng go Yena?

Karabo: Tšohle tše re di hlokago, e ka ba tša nama e ka ba tša moya, tšeo Morena Jesu a di bolelago thapelong yeo a re rutilego yona.

Potšišo ya 119: Thapelo ya Morena e reng?

Karabo: Tatawešo wa magodimong

Leina la gago a le kgethwe

Mmušo wa gago a o tle

Thato ya gago a e dirwe lefaseng bjalo ka ge e dirwa legodimong

O re fe lehono bogobe bja rena bja ka mehla

O re lebalele melato ya rena bjalo ka ge re lebalela ba ba nago le melato go rena

O se re iše molekong, eupša o re phološe bobeng

Gobane mmušo ke wa gago, le maatla, le tumišo, ka go sa felego.

Amene.

SONTAGA SA 46 TATAWEŠO WA MAGODIMONG

Potšišo ya 120: Ke ka lebaka la eng ge Kriste a re laetše go bitša Modimo 'Tatawešo'?

Karabo: Ke ka gobane Modimo o bile Tatago rena ka baka la Kriste, gomme o rata gore re batamele go Yena ka moya wa bongwana.

Ditemana tša Beibele: Mateo 7:9-11,

Baroma 8:14-17

Potšišo ya 121: Ke ka lebaka la eng ge go oketšwa mantšu a a reng 'wa magodimong'?

Karabo: Ke gore re se ke ra gopolela bogoši bja Modimo bjalo ka tša selefase,

eupša re tshepe gore ga go na se se mo palelago.

Ditemana tša Beibele: Mmoledi 5:1,

Ditiro 17:24-25.

SONTAGA SA 47 THAPELO YA PELE

Potšišo ya 122: Thapelo ya pele e reng?

Karabo: Leina la gago a le kgethwe. Ke gore:

Sa mathomo re nee go go tseba gabotse, gomme medirong ya gago yohle re go rete, re go tumiše. Sa bobedi leina la gago le se ke la nyefolwa ka baka la rena, eupša le fiwe tlhompho le tumišo.

Ditemana tša Beibele: Johane 17:3,

1 Bakorinthe 10:31, Mateo 5:16

SONTAGA SA 48 THAPELO YA BOBEDI

Potšišo ya 123: Thapelo ya bobedi e reng?

Karabo: Mmušo wa gago a o tle. Ke gore:

Sa mathomo, re buše ka Lentšu la gago le ka Moya wa gago, gore re tle re ineele ka mehla go wena. Sa bobedi, O boloke le go atiša kereke ya gago. Sa boraro, O fediše maatla a sathane le maatla ohle ao a ikgodišago kgahlanong le wena. Sa bone, O dire bjalo go fihlela ge botlalo bja mmušo wa gago bo etla.

Ditemana tša Beibele: (1) Dipsalme 143:10, (2) Ditiro 2:42-47, (3) 1 Johane 3:8, (4) 1 Bakorinthe 15:28

SONTAGA SA 49 THAPELO YA BORARO

Potšišo ya 124: Thapelo ya boraro e reng?

Karabo: Thato ya gago a e dirwe lefaseng, bjalo ka ge e dirwa legodimong. Ke gore:

Sa mathomo, O re fe gore re tlogele thato ya rena, re ipee ka tlase ga thato ya gago ye e lokilego e nnoši. Sa bobedi, mang le mang a phethagatše pitšo ya gagwe le mošomo wa gagwe bjalo ka ge go dira barongwa legodimong.

Ditemana tša Beibele: (1) Mateo 16:24, Luka 22:41-43, (2) Baefeso 6:5-9, Dipsalme 103:20-21

SONTAGA SA 50 THAPELO YA BONE

Potšišo ya 125: Thapelo ya bone e reng?

Karabo: O re fe lehono bogobe bja rena bja ka mehla. Ke gore:

O re fe tšohle tšeo re di hlokago mo bophelong, re tle re lemoge gore ke wena tlhago ya dimpho tšohle tše botse. Re lemoge gore boitapišo bja rena bo ka se re hole selo ka ntle le tshagofatšo ya gago.

O re fe gore re tloše tshepo ya rena mo go dibopiwa ka moka, re e bee mo go wena fela.

Ditemana tša Beibele: Dipsalme 145:15-16,

Mateo 6:25-34, Jakobo 1:17

SONTAGA SA 51 THAPELO YA BOHLANO

Potšišo ya 51: Thapelo ya bohlanano e reng?

Karabo: O re le balele melato ya rena bjalo ka ge re le balela ba ba nago le melato go rena. Ke gore:

Rena badiradibe a nke o re le balele melato ya rena yohle le bobbe ka moka ka lebaka la madi a Kriste, bjalo ka ge e le maikemišetšo a rena gore re le balele batho ba bangwe ka pelo yohle.

Ditemana ta Beibele: Dipsalme 51:1-7,

Mateo 6:14-15

SONTAGA SA 52 THAPELO YA BOSELELA

Potšišo ya 127: Thapelo ya boselela e reng?

Karabo: O se re iše molekong, eupša o re phološe bobeng. Ke gore:

Ka ge manaba a rena (e lego diabolo, lefase le yona nama ya rena) a re hloriša ka mehla, re kgopela gore o re tiiše ka maatla a MoyaMokgethwa, gore re se ke ra hwa mo ntweng ya moya, eupša, re fenye manaba a rena go fihlela mafelelong ge re fenya ka go sa felego.

Ditemana tša Beibele: 1 Petro 5:8,

Johane 15:18-21, Bagalatia 5:17,
1 Bakorinthe 10:13, 1 Bathess. 5:23

Potšišo ya 128: O tswalela bjang thapelo ya gago?

Karabo: Gobane mmušo ke wa gago le maatla le tumišo ka go sa felego. Ke gore: Ntate, re kgopela tšohle tše go wena, ka gobane o na le lerato le bokgoni bja go re fa tšona. Gape go tumišwe leina la gago mehleng ya neng le neng.

Ditemana tša Beibele: Dipsalme 115:1

Potšišo ya 129: Lentswana la 'amene' le reng?

Karabo: Amene ke gore: Ke na le nnete, gomme ga ke belaele, gore thapelo ye e kwelwe ke Modimo.

*Ditemana tsa Beibele: 2 Timotheo 2:13,
2 Bakorinthe 1:20*